

LA WG

LA WG PERFETGA

da Chatrina Josty

„Grmpf, hihi, haha“, fan bliers cur che jau raquint che jau haja per il mument ina wg cun ina dunna pli veglia. Ma qua na datti nagut da far schnöss e rir da quai curius. Star cun ina dunna pli veglia è numnadamain fitg cool. Gea, nossa wg s’ha sminuida sin ina wg da duas; il Mike era svanì tuttenina. Cun ses auto e ses piercings.

„Hihi, haha“, fan ils auters anc adina, ma jau ri lura anc blier pli dad aut. Ha! Tgi ha gia il zimmerservice integrà en il fit da l’abitaziun? Haha! Ok, ella na vesa forse betg pli tut la pulvra, ma tgi survegn bunamain mintga di in toc turta? Mhm... ok, latiers vegn mintgamai il recept ed il cumond da far in pèr copias en biro per dar a sias amias. Ma quai fatsch jau gugent per la Frau Zimmerli, äh, per la Mirta. Ella ha fatg duzis cun mai. Per quai ha ella tschernì il mument perfetg; ina damaun gist cur che jau sun vegnida or da la duscha ha ella fatg “bun diiiii” e ditg, “jau sun lura la Mirta”. Chau Mirta.

Jau hai super cun la Mirta, star cun la Mirta è sco star cun l’atgna nona. E star cun la nona è cool. Ella lava mia vestgadira, ella ma lascha parcar l’auto davant sia chasa, ella va baud a letg e na fa nagina canera la notg ed ella na recloma betg, sche jau fatsch canera. Ed ella baiva Elmer Citro, sco ch’ina dretga Nona ha da far quai.

Igl è simplamain perfetg ed jau stess il pli gugent per adina là.

Ma jau hai gia stuì far midada, mo ina pitschna però. Ma perquai che in auter um, che abitava era gia là, vegn uss lura puspè a star tar Mirta, e perquai ch’el haja adina gè la stanza nua che jau sun èn, hai jau uss stuì far midada en l’altra.

E quella n’è betg uschè patgifica sco l’altra. Pli gronda e cun in letg dad anno 1920 ed il mender, nagin SF info tranter ils programs da televisiun, ed RTL II è sin posiziun 27. Insumma betg flot, ma jau crai, quai èn plitost problems da luxus.